

Nos Antepasadonan...

Hermoginus Sixto Croes "Mo Tito"

Hermoginus Sixto Croes - cariñosamente jamá 'Mo Tito' - a nace dia 15 di October 1894 na Macuarima, Santa Cruz. Ya for di su infancia Mo Tito a cuminsa experimentá riba su fió di hunga. E mes tabata traha nan di palo di siya (palisia) of di palo di boonchi. Pa e cabeynan di e barestía e tabata usa rabo di cabay. Cu lijm di palo di cashú y di palo di kwihi e tabata strijk e cabeynan di e barestía.

Pa cuerde el a usa shirishiri di bestia. Ya for di hoben el a cuminsa toca fió y a demostrá cu e tabata tin un gran talento musical. Na edad di 16 aña Mo Tito a forma e prome "Conhunto Folclorico Arubano": un fió, un wicharo, un tambor y un cantante. Nan tabata sali riba burico pa bai toca na casnan di famia, fiesta di casamento, fiesta di San Juan, San Pedro, Tres Rey y hopi mas. Nan a toca tambe na Curaçao, Colombia y Venezuela y hasta durante bishitanan Real na nos isla.

Pa 65 aña Mo Tito a core y toca Dande. Den su hubentud, e paranda di Dande ta cuminsa dia 31 di December te 6 di Januari. Den bida diario e tabata doño di un tienda di cuminda.

Un persona religioso, amabel, cariñoso y masha popular. Un pionero di musica folclore. Dia 3 di December 1923 Mo Tito a casa cu Abelita Croes. Di e matrimonio aki a nace cinco jiu. Mo Tito tabata un homber talentoso, paso e tabata toca su fió sin por a lesa musica. El a toca te cusu 79 aña. E motibo cu el a stop, ta pasobra un derame cerebral a laga su braza y dedenan lam. Dia 9 di October 1982 Mo Tito a bai descansa, faltando net 6 dia p'el a cumpli 88 aña.




Triki cu awa salá

Bo mester di:

- 2 glas,
- salo,
- 2 webo.

Jena un glas (#1) na mitar cu awa, y pone un webo poco-poco aden.

Jena e otro glas (#2) tambe na mitar cu awa, pero prome cu hinca webo den esaki, mester basha 10 cuchara grandi di salo. Awor por hinca e webo aden.



Bo kier sa pakiko esaki a sosode?

E webo ta flota den glas # 2, como cu e likido den e glas aki ta mas denso (mas pisá). E salo ta haci tur e verschil.

Ban haci un triki mas!

Lagando e awa salo y e webo den glas #2, basha poco-poco cu un cuchara gewoon awa acerca.

Kiko a pasa? A webo a bin halto? Of el a keda na e mesun lugar?



Chabalito

Number 4 - Año IV
December, 2001 - Afl. 2,=

